



**SULTAN IBRAHIM SULTAN ISKANDAR** memasukkan pedang ke dalam plak kaca sebagai gimik pelancaran Tatu Kemahkotaan sambil diperhatikan Raja Zarith Sofiah Sultan Idris Shah di Stadium Kluang, Johor, malam semalam. Turut kelihatan Hishammuddin Tun Hussein dan Zulkifeli Mohd. Zin (kiri). - UTUSAN/RAJA JAAFAR ALI

## Tatu Kemahkotaan pukau pengunjung

**KLUANG 5 April** - Persembahan Tatu Kemahkotaan yang menggabungkan kekuatan Angkatan Tentera Malaysia (ATM) bersama Polis Diraja Malaysia (PDRM) berjaya memukau lebih 5,000 pengunjung yang menyaksikan pertunjukan itu di Stadium Kluang, di sini malam tadi.

Sultan Johor, Sultan Ibrahim Sultan Iskandar dan Permaisuri Johor, Raja Zarith Sofiah Sultan Idris Shah turut berkenan berangkat menyaksikan pertunjukan yang diadakan bersempena Istiadat Kemahkotaan baginda.

Pertunjukan membatikan 1,500 pegawai dan anggota ATM serta PDRM itu berkonsepkan gabungan persembahan pancaragam dan kepakaran kedua-dua pasukan keselamatan tersebut.

Antara yang dipertontonkan termasuklah persembahan drum-liner Pusat Latihan Muzik Tentera Darat (Puzida), kawad senyap, persembahan kawad patung dan pancaragam PDRM.

Selain itu, persembahan gabungan anjing perang ATM dan PDRM, persembahan Wira Merah (Army Red Warrior), kepakaran Gerup



**PERSEMBAHAN** kawad patung daripada PDRM mencuit hati ribuan penonton sempena pertunjukan Tatu Kemahkotaan di Stadium Kluang, Johor, malam semalam.

Gerak Khas (GGK) serta gabungan aksi payung terjun dari Rejimen 21 GGK dan VAT 69 Komando turut mengambil bahagian.

Yang turut hadir Menteri Pertahanan, Datuk Seri Hishammuddin Tun Hussein; Panglima ATM, Jeneral Tan Sri Zulkifeli Mohd. Zin dan Ketua Polis Negara, Tan Sri Khalid Abu Bakar.

Terdahulu, orang ramai yang

mula membanjiri stadium seawal pukul 6 petang turut dihiburkan dengan persembahan pentas beberapa artis terkenal termasuk Fazli Zainal, Ayai Ilusi dan Ameng Spring.

Pada akhir acara tersebut, pertunjukan bunga api selama 10 minit menutup persembahan Tatu Kemahkotaan sebelum Sultan Ibrahim dan Raja Zarith Sofiah berangkat pulang.